

## CONVENIO DE COLABORACIÓN ENTRE A CONSELLERÍA DE CULTURA, LINGUA E XUVENTUDE E A UNIVERSIDADE DA CORUÑA PARA ACTUACIÓNS EN MATERIA DE NORMALIZACIÓN LINGÜÍSTICA

### REÚNENSE

**Don José Carlos López Campos**, conselleiro de Cultura, Lingua e Xuventude que actúa en virtude das facultades atribuídas no artigo 34 da Lei 1/1983, do 22 de febreiro, reguladora da Xunta e da súa Presidencia, modificada pola Lei 11/1988, do 20 de outubro e pola Lei 12/2007, do 27 de xullo, de acordo co seu nomeamento polo Decreto 44/2024, do 14 de abril (DOG núm. 73, do 14 de abril), e polo disposto no Decreto 49/2024, do 22 de abril, polo que se fixa a estrutura orgánica das consellerías da Xunta de Galicia (DOG núm. 81, do 24 de abril).

**Don Ricardo José Cao Abad**, reitor da Universidade da Coruña, que actúa en nome e representación desta institución en virtude do establecido no artigo 126 dos Estatutos da Universidade da Coruña, aprobados polo Decreto 94/2025, do 6 de outubro (DOG núm. 207, do 27 de outubro) e do seu nomeamento como reitor polo Decreto da Comunidade Autónoma de Galicia 1/2024, do 11 de xaneiro (DOG núm. 10, do 15 de xaneiro de 2024).

### EXPOÑEN

Que ambas as dúas institucións consideran como referente normativo básico da súa actuación o artigo 5 do Estatuto de autonomía de Galicia e o artigo 15 da Lei 3/1983, do 15 de xuño, de normalización lingüística (DOG núm. 84, do 14 de xullo de 1983), segundo os que o profesorado e o alumnado no nivel universitario teñen o dereito de empregar a lingua oficial da súa preferencia. O Goberno galego e as autoridades universitarias arbitrarán as medidas oportunas para normalizar o uso do galego no ensino universitario e facer efectivo este dereito para o alumnado.

Que no ámbito da Administración autonómica galega, lle corresponden á Consellería de Cultura, Lingua e Xuventude a través da Secretaría Xeral da Lingua as competencias e funcións en materia de promoción e ensino da lingua galega e de dirección, planificación,



coordinación e execución da política lingüística da Xunta de Galicia. O compromiso das tres universidades galegas neste proceso resulta transcendental e así o constatan os seus propios estatutos, onde o galego ten o carácter de lingua oficial.

Que as partes son conscientes da responsabilidade que teñen de colaborar no proceso normalizador, así como na implantación das medidas do Plan xeral de normalización da lingua galega que aprobou, por unanimidade, o Pleno da Cámara do Parlamento de Galicia na súa sesión do día 21 de setembro de 2004, destinadas a promover un maior nivel de galeguización no ámbito universitario, tanto na docencia e investigación como no que se refire ás relacións extra académicas e tamén, favorecer a súa dinamización no tecido económico para estender o seu uso nas relacións laborais, comerciais e empresariais co fin de incrementar produtos e servizos en galego en todos os ámbitos sociais e económicos.

Que neste sentido, a Xunta de Galicia e a Universidade da Coruña xa asinaron no ano 1991 un convenio marco de colaboración para desenvolver diversas actuacións para conseguir a normalización lingüística no ámbito universitario. Logo do tempo transcorrido, e como queira que as dúas institucións manifestaron a súa vontade de continuar colaborando, considerouse conveniente asinar convenios anuais para establecer o marco de actuación de ambas as institucións en materia de política lingüística.

Que, para levar a cabo as actuacións que se prevén neste convenio, pola singularidade do seu obxecto, características e ámbito de actuación, non é posible promover a concorrência pública, pois a Universidade da Coruña é unha institución cunha estrutura de goberno, autonomía e competencias propias establecidas por lei orgánica e polos seus propios estatutos.

Polo anteriormente exposto, acordan asinar un convenio de colaboración para o ano 2026 que se rexerá polas seguintes

## ESTIPULACIÓNS

### Primeira. Obxecto



Este convenio ten por obxecto establecer as bases polas que se rexerá a colaboración entre a Consellería de Cultura, Lingua e Xuventude, a través da Secretaría Xeral da Lingua, e a Universidade da Coruña para colaborar no desenvolvemento de iniciativas conxuntas para prestixiar e promover no ensino universitario a estima do galego como feito diferencial da nosa comunidade autónoma.

As partes colaborarán na realización dun programa de actuacións orientadas a promover un maior nivel de galeguización das universidades galegas, tanto na docencia, investigación e alumnado como no que se refire a relacións extra académicas e o teatro.

### **Segunda. Obrigas da Universidade da Coruña (UDC)**

Como compromisos ás obrigas derivadas da Lei 3/1983, do 15 de xuño, de normalización lingüística e do Plan xeral de normalización da lingua galega mediante a sinatura do presente convenio (DOG núm. 84, do 14 de xullo de 1983), A UDC comprométese a levar a cabo durante o ano 2026 as seguintes accións, que se engloban dentro das seguintes epígrafes:

1. Soporte bibliográfico e material didáctico para a realización de teses de doutoramento, traballos de fin de mestrado e traballos de fin de grao.
2. XIX Curso de verán sobre dinamización lingüística: Traballando en Lingua e memoria democrática: a quimera da normalización.
3. 6 Cursos de formación para o PTXAS (persoal técnico, de xestión e de administración e servizos) e para o PDI (persoal docente e investigador):
  - Curso de Atención ao Público (PTXAS)
  - Curso Básico de Aproximación á Lingua (PDI)
  - Curso de Actualización de Competencias Lingüísticas (PDI e PTXAS)
  - Curso Superior de Competencias Lingüísticas (PDI e PTXAS)
4. Campaña para a extensión do uso da lingua galega na Universidade da Coruña.



Esta actividade inclúe a coordinación e deseño de campaña, gravación, edición, montaxe vídeos en distintos formatos para emitir nas pantallas da universidade e nas redes sociais, con mensaxes motivadoras que redunden na importancia do uso do galego, deseño e desenvolvemento do plan de comunicación, creación, edición e adaptacións vídeos a diferentes formatos e RRSS e con subtítulos, dinamización dunha acción participativa nas facultades, deseño gráfico de material que permita a difusión da campaña e actividades asociadas á campaña.

A difusión da campaña realizaríase a través dos recursos que conta cada unha das tres universidades que fomenten o uso do galego e, se for posible, unificaríanse nunha plataforma centralizada en liña.

5. Estudo do coñecemento, uso e percepción da lingua galega no conxunto da comunidade da Universidade da Coruña. Comparativo 2005-2025. Informe técnico.
6. Campaña para sensibilizar sobre o uso do galego na comunidade universitaria a través da colocación de vinilos nos baños de todos os centros da Universidade para fomentar a escoita de música en galego. Ademais, tamén se pretende dar visibilidade ao Servizo de Normalización Lingüística.
7. Traballos de actualización da normativa de usos lingüísticos da comunidade universitaria.
8. Observatorio do Teatro Galego, Premio Manuel Olveira "Pico" para galardoar os traballos das persoas intérpretes galegas en relación coa calidade do seu modelo oral galego.

O programa de actuacións e actividades que se desenvolverán no ano 2026 xúntase como anexo e forma unha parte íntegra deste convenio.

A UDC comprométese a publicar e difundir en galego os materiais científicos ou didácticos obxecto deste convenio en soporte papel e na páxina web para poñelos á disposición dos investigadores e do público en xeral.



### **Terceira. Modificación do convenio / redistribución de cantidades entre diferentes actividades**

Se posteriormente á sinatura do convenio, e por circunstancias debidamente xustificadas, a entidade quere modificar ou cambiar algunha das accións contempladas no obxecto do convenio, esta modificación ou cambio instrumentarase mediante a correspondente addenda, agás naqueles casos nos que a modificación implique só unha redistribución das cantidades previstas estimativamente, de ser o caso, para cada unha delas segundo a desagregación prevista na memoria xustificativa e económica do convenio que figura no expediente de gasto sen que exista modificación orzamentaria respecto do importe total do convenio nin que implique, de ser o caso, unha redistribución orzamentaria entre diferentes capítulos de gasto.

Os convenios subscritos pola Administración xeral da Comunidade Autónoma e as entidades instrumentais do sector público autonómico poderán ser obxecto de modificación cando teñan como finalidade o logro dos obxectivos de estabilidade orzamentaria e sostibilidade financeira.

As ditas modificacións terán por obxecto a redución do volume das obrigas ou a ampliación do seu prazo de execución.

### **Cuarta. Financiamento**

O importe total das actividades previstas no presente convenio ascenden a un total de **58.500,00 €**, que será sufragado coa achega de ambas as dúas partes coa seguinte desagregación:

**1.** A Consellería de Cultura, Lingua e Xuventude, a través da Secretaría Xeral da Lingua, contribuirá no desenvolvemento das actividades previstas no presente convenio cunha achega total por importe de **35.000,00 €**, con cargo aos orzamentos xerais da Comunidade Autónoma de Galicia para o ano 2026, que se destinarán ás seguintes accións desagregadas nas seguintes partidas orzamentarias.



1. Soporte bibliográfico e material didáctico para a realización de teses de doutoramento, traballos de fin de mestrado e traballos de fin de grao: **7.000,00 €**, con cargo á partida orzamentaria 13.02.151A.640.0.
  2. XIX Curso de Verán sobre Dinamización Lingüística Traballando en Lingua con Inmigrantes: **3.200,00 €**, con cargo á partida orzamentaria 13.02.151A.640.2
  3. 6 cursos de formación para o PTXAS (persoal técnico, de xestión e de administración e servizos) e para o PDI (persoal docente e investigador) **13.300,00 €**, con cargo á partida orzamentaria 13.02.151A.640.2.
    - Curso de Atención ao Público (PTXAS)
    - Curso Básico de Aproximación á Lingua (PDI)
    - Curso de Actualización de Competencias Lingüísticas (PDI e PTXAS)
    - Curso Superior de Competencias Lingüísticas (PDI e PTXAS)
  4. Campaña para a extensión do uso da lingua galega na Universidade da Coruña: **10.000,00 €** con cargo á partida orzamentaria 13.02.151A.640.0
  5. Axuda ao observatorio do teatro. Premio Manuel Olveira «Pico» **1.500,00 €**.
- 2.** A Universidade da Coruña contribuirá coa achega de **23.500,00 €** de acordo co seguinte:
1. Soporte bibliográfico e material didáctico para a realización de teses de doutoramento, traballos de fin de mestrado e traballos de fin de grao: **11.300,00 €**, con cargo as partida partidas 18.07.24.07.27.422D.640.00.08 e a 18.07.121A.480.00.
  2. XIX Curso de verán sobre dinamización lingüística, Traballando en Lingua, lingua e memoria democrática: a quimera da normalización: **3.500,00 €** con cargo ás partidas orzamentarias 18.07.24.07.27.422D.640.00.08 e a 18.07.121A.226.06.
  3. Estudo do coñecemento, uso e percepción da lingua galega no conxunto da comunidade da Universidade da Coruña. Comparativo 2005-2025. Informe técnico: **5.500,00 €** con cargo á partida orzamentaria 18.07.121A.226.06.





4. Campaña para sensibilizar sobre o uso do galego na comunidade universitaria: **2.200,00 €** con cargo á partida orzamentaria 18.07.121A.226.02.
5. Traballos de actualización da normativa de usos lingüísticos da comunidade universitaria: **1.000,00 €** con cargo á partida orzamentaria 18.07.121A.226.06.

As ditas achegas financiarán exclusivamente o custo de realización das actividades obxecto deste convenio, sen que ningunha das partes convenientes obteña lucro ningún.

Ambas as dúas partes convenientes, compartirán a titularidade e o uso dos estudos, publicacións e demais materiais que se realicen ao abeiro deste convenio.

O uso e a difusión sobre os ditos estudos, publicacións e demais materiais terá carácter gratuíto para as partes asinantes do convenio, logo do consentimento da outra parte.

#### **Quinta. Xustificación e pagamento**

A documentación requirida na fase xustificativa presentarase telematicamente accedendo ao expediente na Carpeta do cidadán da persoa solicitante/representante, <https://sede.xunta.es/carpeta-do-cidadan>. Código de procedemento PRO04A

Para percibir a cantidade que achega a Consellería de Cultura, Lingua e Xuventude e que se indica na estipulación anterior, a UDC presentará telematicamente, coa data límite do 15 de novembro de 2026, a seguinte documentación:

- Certificación do/da xerente da Universidade da execución das actividades do convenio, xunto coas correspondentes notas de cargo emitidas polo servizo correspondente da UDC.
- Un informe de resultados das actividades realizadas no marco do convenio e da súa incidencia na promoción da lingua.
- Para control das actividades que se prevén no convenio, no caso de que se elaboren materiais, reproducións ou publicacións relacionadas coas actuacións acordadas, entregarase un exemplar destas.



- Ficha resumo de execución do convenio (anexo I que se acompaña co texto deste documento), cuberta pola entidade e na que se indicará, de ser o caso, o número de proxectos, accións ou actividades que se realicen ao abeiro deste, as localidades de execución ou realización, así como a porcentaxe de gasto en proxectos, accións ou actividades dirixidas ás franxas de idade infantís ou xuvenís. Tamén indicarán, se procede, o número aproximado de persoas destinatarias ou beneficiarias das accións coa súa correspondente desagregación porcentual por sexos.

A entidade procurará utilizar o idioma galego en todas as comunicacións que estableza coa Consellería de Cultura, Lingua e Xuventude.

De non alcanzarse o total do orzamento das actividades, a achega de ambas as dúas partes asinantes deste convenio, verase reducida na mesma proporción.

Antes de proceder á sinatura deste convenio e para o pagamento, deberá presentar:

- Certificado de non ter pendente de pagamento ningunha débeda coa Administración pública da Comunidade Autónoma de Galicia, expedido pola Consellería de Facenda e Administración Pública.
- Certificado de estar ao día nas obrigas tributarias, expedido pola correspondente delegación ou axencia do Ministerio de Facenda.
- Certificado de atoparse ao corrente das obrigas sociais, expedido pola Tesourería da Seguridade Social.

A sinatura deste convenio comportará a autorización ao órgano xestor para solicitar as certificacións que deban emitir a Axencia Estatal da Administración Tributaria, a Tesourería da Seguridade Social e a Consellería de Facenda e Administración Pública da Xunta de Galicia.

A UDC facilitará toda a información que lle sexa requirida pola Consellería de Cultura, Lingua e Xuventude así como pola Intervención Xeral da Comunidade Autónoma, Consello de Contas e o Tribunal de Contas no exercicio das súas funcións de fiscalización e control.



## **Sexta. Rexistro de Convenios. Transparencia e bo goberno**

A sinatura deste convenio suporá o consentimento expreso do interesado á administración para incluír e facer públicos os datos referidos ao convenio de conformidade co artigo 15 da Lei 1/2016, do 18 de xaneiro, de transparencia e bo goberno (DOG núm. 30, do 15 de febreiro de 2016), co artigo 8 da Lei 19/2013, do 9 de decembro, de transparencia, acceso á información pública e bo goberno (BOE núm. 292, do 10 de febreiro de 2013) e co Decreto 126/2006, do 20 de xullo, polo que se regula o rexistro de convenios da Xunta de Galicia (DOG núm. 149, do 3 de agosto de 2006).

Así mesmo, coa sinatura deste convenio as partes asinantes manifestan o seu consentimento para que os seus datos persoais que aparecen nel e mais o resto das especificacións nel contidas poidan ser publicados no Portal da Transparencia e Goberno Aberto.

## **Sétima. Vixencia**

Este convenio estará vixente dende a data da súa sinatura ata o 30 de novembro de 2026. Non obstante, este convenio poderá extinguirse por acordo mutuo e voluntario das partes, por desistencia dalgunha ou por denuncia do mesmo por incumprimento dos compromisos adquiridos, o que se comunicará de xeito fidedigno, previa audiencia da outra parte e con polo menos, un mes de antelación.

## **Oitava. Causas de resolución**

O presente convenio resolverase:

- Por incumprimento total ou parcial dalgún dos seus acordos.
- Polo transcurso do tempo estipulado sen que se culminen as accións acordadas
- De se resolver o convenio, a consellería de Cultura, Lingua e Xuventude pode, se fose o caso, esixir a devolución das cantidades achegadas e os correspondentes xuros.



### **Novena. Responsabilidade das actuacións**

O asinamento deste convenio non implica relación contractual ou de calquera outro tipo entre as persoas que vaian desenvolver as accións previstas no convenio e a Xunta de Galicia, de tal xeito que a esta non se lle pode esixir responsabilidade ningunha –nin directa, nin indirecta, nin subsidiaria– polos actos ou feitos acaecidos no desenvolvemento do convenio.

### **Décima. Imposibilidade de promover a concorrencia pública**

O Plan estratéxico de convenios de colaboración para subscribir pola Consellería de Cultura, Lingua e Xuventude a través da Secretaría Xeral da Lingua con outras institucións e entidades de base asociativa ou fundacional e con universidades, públicas ou privadas, para realizar actividades de dinamización lingüística no ámbito da promoción e difusión da lingua galega para o ano 2026, no seu apartado 7 dispón que, o que se persegue coa sinatura dos convenios é promover e fomentar a lingua e a cultura galegas coa finalidade de que estea presente en todos os ámbitos e sectores sociais e económicos da Comunidade Autónoma, garantindo que calquera cidadán ou cidadá poida vivir plenamente en galego, establecendo entre as partes do convenio unha colaboración para levar a cabo unha serie de actuacións en resposta a obxectivos de interese social compartidos. A imposibilidade de promover a concorrencia pública queda xustificada en razón ás características singulares e únicas das actividades a desenvolver polas diferentes entidades ao abeiro destes convenios, xa que, o seu obxecto responde á idea de colaboración na consecución dun fin común de interese público e social e de coparticipación e coorganización na realización de actividades que serven como instrumento para a promoción da lingua e da cultura galegas.

Dada a singularidade e características das actividades que se van desenvolver no marco do convenio, soamente se poderán realizar levar a cabo pola Universidade da Coruña no seu ámbito de actuación e, se temos en conta que a colaboración no proceso normalizador tamén se fai extensiva as restantes universidades en Galicia –Universidade de Santiago de Compostela e Universidade de Vigo– mediante a sinatura de convenios,



non resulta posible promover a concorrência pública para a realización das actividades previstas en este convenio.

### **Décima primeira. Comisión de Seguimento**

Créase unha comisión de seguimento que supervisará e avaliará a correcta execución das actividades obxecto do presente convenio, constituída por dous representantes da Secretaría Xeral da Lingua e dous representantes da UDC. Esta comisión, que estará presidida por un dos representantes da Secretaría Xeral da Lingua, estará facultada para resolver cantas dúbidas xurdan na súa execución. Os acordos adoptados neste sentido serán inmediatamente executivos.

### **Décimo segunda. Avaliación de resultados**

A Consellería de Cultura, Lingua e Xuventude a través da Secretaría Xeral da Lingua avaliará a realización das actividades recollidas na estipulación segunda do convenio e a súa incidencia efectiva na dinamización da lingua.

### **Décimo terceira. Utilización da lingua galega**

Todas as actividades que se realicen ao abeiro deste convenio deberanse levar a cabo de acordo co indicado nas vixentes normas ortográficas e morfolóxicas do idioma galego, aprobadas pola Real Academia Galega no ano 2003, tal como se establece na disposición adicional da Lei 3/1983, do 15 de xuño, de normalización lingüística (DOG núm. 84, do 14 de xullo de 1983). Así mesmo, coidarase especialmente do respecto rigoroso da toponimia oficial nos termos previstos no artigo 10 da citada lei.

Será considerada causa específica de resolución deste convenio o incumprimento desta cláusula.



#### **Décimo cuarta. Difusión da colaboración das partes**

Nas actuacións informativas e divulgativas e nas publicacións que se fagan relacionadas coas actividades deste convenio farase constar, nun lugar destacado, a colaboración das partes e utilizaranse, cando proceda, os anagramas de cada unha das entidades aprobados pola normativa de identidade corporativa.

Así mesmo, sexa cal for o medio de difusión, cada unha das partes comprométese a facer mención da outra parte e deste convenio.

#### **Décimo quinta. Notificación electrónica**

Segundo o artigo 14.2 da Lei 39/2015, do 1 de outubro, do procedemento administrativo común das administracións públicas (BOE núm. 236, do 2 de outubro de 2015), os colectivos que están obrigados a relacionarse a través de medios electrónicos coas administracións públicas, e polo tanto, a recibir notificacións por canles electrónicas son: as persoas xurídicas, as entidades sen personalidade xurídica, os colexios profesionais, os que representen unha persoa interesada que estea obrigada a relacionarse electronicamente coa Administración e, os empregados e as empregadas das administracións públicas para os trámites que realicen con elas por razón da súa condición de empregado público.

As notificacións realizaranse só por medios electrónicos a través do Sistema de Notificación Electrónica de Galicia Notific@, <https://notifica.xunta.gal>. Para poder acceder a unha notificación electrónica, o interesado deberá contar cun certificado electrónico asociado ao NIF que figure como persoa destinataria da notificación (persoa física ou xurídica). Así mesmo, a persoa interesada pode autorizar a calquera outra persoa a acceder ao contido das súas notificacións.

#### **Décimo sexta. Protección de datos de carácter persoal e garantía dos dereitos dixitais**

As partes asinantes comprométese a cumprir, en todo momento, as disposicións contidas na normativa básica estatal e autonómica que xustifica a lexitimidade do tratamento dos datos persoais e dos dereitos dixitais.



Na aplicación deste convenio respectaranse cantas esixencias establece o Regulamento UE 679/2016 xeral de protección de datos (DOUE núm. 119, do 4 de maio de 2016) e a Lei orgánica 3/2018, do 5 de decembro (BOE núm. 294, do 6 de decembro de 2018) de protección de datos persoais e garantía dos dereitos dixitais, adoptando cantas medidas resulten necesarias para cumprir as súas previsións e, en particular, para garantir a seguridade e integridade dos datos persoais e dos dereitos dixitais e, a súa protección fronte a alteracións, perdas, tratamentos ou accesos non autorizados.

Serán de aplicación todos os dereitos e obrigas derivados da normativa aplicable en materia de protección de datos e garantía dos dereitos dixitais.

#### **Décimo sétima. Administración dixital**

As partes asinantes deste convenio respectarán cantas esixencias establece a Lei 4/2019, do 17 de xullo, de administración dixital de Galicia (DOG núm. 141, do 26 de xullo de 2019), que será aplicable ao sector público autonómico, integrado, de acordo co artigo 3 da Lei 16/2010, do 17 de decembro, de organización e funcionamento da Administración xeral do sector público autonómico de Galicia (DOG núm. 251, do 10 de febreiro de 2011), pola Administración xeral e polas entidades instrumentais e, tamén, será aplicable á cidadanía que ten o deber de utilizar os servizos públicos dixitais que se poñan a súa disposición de xeito adecuado, co respecto das normas de uso, xerais ou específicas, que se establezan para cada un dos servizos e, en particular, os cidadáns e as cidadás deberán utilizar os sistemas de identificación e de sinatura electrónicas de que sexan lexítimos titulares, usar a información dispoñible conforme a política de privacidade publicada e respectar a normativa en materia de protección de datos de carácter persoal (artigos 2 a) e b) e 7 apartados 1 e 2 respectivamente da citada lei).

#### **Décimo oitava. Normativa aplicable e xurisdición**

Este convenio ten carácter administrativo e os seus efectos rexeranse polo establecido nas súas estipulacións, e quedará suxeito ao disposto nos artigos 47 e seguintes da Lei 40/2015,



do 1 de outubro, do réxime xurídico do sector público (BOE núm. 236, do 2 de outubro de 2015).

Aínda que é un dos excluídos do ámbito de aplicación da Lei 9/2017, do 8 de novembro, de contratos do sector público (BOE núm. 272, do 9 de novembro de 2017) segundo especifica o seu artigo 6, ao non previsto e de acordo co artigo 4 da citada lei aplicaráselle os principios recollidos nela, co fin de resolver dúbidas e omisións que puidesen presentarse. Así mesmo, supletoriamente terase en conta o Decreto legislativo 1/1999, do 7 de outubro, pola que se aproba o texto refundido da Lei de réxime financeiro e orzamentario de Galicia (DOG núm. 214, do 5 de novembro de 1999) e demais normativa vixente na materia.

A Intervención Xeral da Comunidade Autónoma verificará a correcta aplicación destas achegas mediante a aplicación das técnicas de fiscalización e auditoría previstas no Decreto Legislativo 1/1999, de 7 de outubro, polo que se aproba o Texto refundido da Lei de réxime financeiro e orzamentario de Galicia (DOG núm. 214, do 5 de novembro de 1999) e nas normas que a desenvolven e demais normativa vixente.

A posible discrepancia na aplicación e/ou interpretación deste convenio resolverase por diálogo directo entre as partes ou pola comisión de seguimento prevista na estipulación novena.

A xurisdición contencioso-administrativa será a competente para dirimir as cuestións que puidesen xurdir da aplicación deste convenio.

En proba de conformidade, as partes asinan telematicamente este convenio.

O conselleiro de Cultura, Lingua e  
Xuventude.

O reitor da Universidade da Coruña.

José Carlos López Campos

Ricardo José Cao Abad





## ANEXO

### ORZAMENTO DESAGREGADO POR ACTIVIDADES

#### Achega da Secretaría Xeral da Lingua

1. SOPORTE BIBLIOGRÁFICO E MATERIAL DIDÁCTICO PARA A REALIZACIÓN DE TESES DE DOUTORAMENTO, TRABALLOS DE FIN DE MESTRADO E TRABALLOS DE FIN DE GRAO

TOTAL ..... 7.000 €

2. XIX CURSO DE VERÁN SOBRE DINAMIZACIÓN LINGÜÍSTICA, TRABALLANDO EN LINGUA, LINGUA E MEMORIA DEMOCRÁTICA: A QUIMERA DA NORMALIZACIÓN

TOTAL ..... 3.200 €

3. 6 CURSOS DE FORMACIÓN PARA O PTXAS (persoal técnico, de xestión e de administración e servizos) E PARA O PDI (persoal docente e investigador)

- Curso de Atención ao Público (1) 1.550 €

- Curso Básico de Aproximación á Lingua (1) 2.250 €

- Curso de Actualización de Competencias Lingüísticas (2) 4.500 €

- Curso Superior de Competencias Lingüísticas (2) 5.000 €

TOTAL ..... 13.300 €

4. CAMPAÑA PARA A EXTENSIÓN DO USO DA LINGUA GALEGA NAS TRES UNIVERSIDADES GALEGAS (UNIVERSIDADE DA CORUÑA, UNIVERSIDADE DE SANTIAGO DE COMPOSTELA E UNIVERSIDADE DE VIGO)

TOTAL ..... 10.000 €

5. AXUDA AO OBSERVATORIO DO TEATRO GALEGO

TOTAL ..... 1.500 €

**TOTAL ..... 35.000 €**





### Achega da Universidade da Coruña

1. SOPORTE BIBLIOGRÁFICO E MATERIAL DIDÁCTICO PARA A REALIZACIÓN DE TESES DE DOUTORAMENTO, TRABALLOS DE FIN DE MESTRADO E TRABALLOS DE FIN DE GRAO

TOTAL ..... 11.300 €

2. XIX CURSO DE VERÁN SOBRE DINAMIZACIÓN LINGÜÍSTICA, TRABALLANDO EN LINGUA, LINGUA E MEMORIA DEMOCRÁTICA: A QUIMERA DA NORMALIZACIÓN

TOTAL ..... 3.500 €

3. ESTUDO DO COÑECEMENTO, USO E PERCEPCIÓN DA LINGUA GALEGA NO CONXUNTO DA COMUNIDADE DA UNIVERSIDADE DA CORUÑA. Comparativo 2005-2025. INFORME TÉCNICO

TOTAL ..... 5.500 €

4. CAMPAÑA PARA SENSIBILIZAR SOBRE O USO DO GALEGO NA COMUNIDADE UNIVERSITARIA

TOTAL ..... 2.200 €

5. TRABALLOS DE ACTUALIZACIÓN DA NORMATIVA DE USOS LINGÜÍSTICOS DA COMUNIDADE UNIVERSITARIA

TOTAL ..... 1.000 €

**TOTAL ..... 23.500 €**

**TOTAL DO CONVENIO ..... 58.500€**

